

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA

Broj: 02-02-7-827/16
Sarajevo, 23. 6. 2016. godine

Z A P I S N I K

**12. sjednice Doma naroda Parlamenta Federacije Bosne i Hercegovine,
održane 21. aprila, 12. maja i 23. juna 2016. godine**

Sjednica je počela u 11:50.

Sjednicom je predsjedavala Lidija Bradara, predsjedavajuća Doma naroda Parlamenta Federacije BiH.

Prije početka sjednice predsjedavajuća je pozdravila delegate, goste i ministre u Vladi, kao i potpredsjednika Federacije Bosne i Hercegovine, Milana Dunovića i potpredsjednicu Vlade Federacije, Jelku Milićević.

Na osnovu evidencije Stručne službe, predsjedavajuća je konstatovala da sjednici prisustvuje 43 delegata, što čini većinu, te Dom može raditi i punovažno odlučivati.

Izostanak sa sjednice najavili su delegati Nikola Simić i Damir Jukić.

Predsjedavajuća je dala na glasanje Zapisnik 10. sjednice Doma naroda Parlamenta Federacije BiH, održane 17. i 31. marta 2016. godine i, na osnovu rezultata glasanja, konstatovala da je Dom naroda Parlamenta Federacije BiH, bez primjedbi, sa 37 glasova za i jednim uzdržanim, usvojio Zapisnik 10. sjednice Doma naroda Parlamenta Federacije BiH.

Na osnovu člana 104. Poslovnika o radu Doma naroda Parlamenta Federacije BiH, predsjedavajuća je pozvala delegate da postavе delegatska pitanja i pokrenu inicijative.

Delegatska pitanja i inicijative

Slobodan Tomić je pokrenuo inicijativu za donošenje izmjena Zakona o doprinosima.

Segmedina Srna Bajramović je izrazila nezadovoljstvo odgovorima na pitanja o medijskoj kampanji „Skinimo okove“. Zatražila je od Vlade da joj dostave Zaključak broj: 168/2016, kao i korespondenciju koja je prethodila obavezi donošenja ovog zaključka, te pismo namjere koje je potpisao premijer Federacije. Zatražila je pisane odgovore na pitanja u vezi postupka izbora nezavisne agencije za provođenje kampanje, cijene kampanje, i na pitanja da li je Vlada Federacije učestvovala u finansiranju kampanje i da li postoji ugovor Vlade sa nekom od ambasada za ovu kampanju.

Sladjan Ilić postavio je dva pitanja.

Prvo pitanje je postavio Federalnom ministarstvu poljoprivrede, voodoprivrede i šumarstva u vezi spiska fizičkih i pravnih lica sa područja grada Tuzle sa tačnim iznosima poticaja po godinama u periodu 2010. - 2015. godine.

Drugo pitanje upućeno je Federalnom ministarstvu prometa i komunikacija, a tiče se završetka dionice puta M4 na ulazu u Tuzlu (relacija Drežnik - Šićki Brod).

Aner Žuljević je pokrenuo incijativu i postavio pitanje.

Uputio je inicijativu Federalnom ministarstvu okoliša i turizma koja se odnosi na izdavanje okolišne dozvole za mini hidroelektrane Buna 1 i Buna 2.

Pitanje je postavio Federalnom ministarstvu pravde u vezi saglasnosti Zakona o državnoj službi i Reformske agende za Bosnu i Hercegovinu za period 2015. - 2018. godina.

Vesna Saradžić je pokrenula incijativu i postavila pitanje.

Postavila je pitanje rukovodstvu Doma naroda u vezi implementacije Akcionog plana za Parlament Federacije BiH za unaprijeđenje njegove uloge u kontekstu EU integracija.

Pokrenula je inicijativu da Federalno ministarstvo poljoprivrede, voodoprivrede i šumarstva donese akcioni plan za sanaciju i ozdravljenje šuma.

Emir Frašto je postavio pitanje Vladi Federacije - kada će Goražde dobiti status grada?

Željko Josić je postavio pitanje Vladi Federacije u vezi Odluke o kategorizaciji cesta u autoceste i brze, magistralne ceste i regionalne ceste, koju je Vlada Federacije donijela 20. 3. 2014. godine.

Zdravko Bešlić je pokrenuo incijativu i postavio pitanje.

Postavio je pitanje Vladi Federacije, a tiče se dostavljanja Zakona o pripadnosti javnih prihoda u Federaciji Bosne i Hercegovine u parlamentarnu proceduru.

Pokrenuo je inicijativu kojom je zatražio od Federalnog ministarstva pravde i Federalne uprave za geodetske i imovinsko - pravne poslove da predlože izmjene Zakona o stvarnim pravima u smislu produženja roka za uknjižbu izvanknjižnih stvarnih prava.

Mirvet Beganović je izrazio nezadovoljstvo dobijenim odgovorom na pitanja o Agrokomercu.

Almedin Aliefendić se osvrnuo na odgovor koji je dobio na pitanje u vezi zakona o sukobu interesa u Federaciji BiH i postavio pitanje Federalnom ministarstvu okoliša i turizma i Federalnom fondu za zaštitu okoliša o

uplatama u Fond svih subjekata koji vrše opterećenje na okoliš po općinama i kantonima za 2015. godinu. Kazao je i to da su lokalne zajednice najviše ugrožene po pitanju okoliša, a da imaju najmanje efekata od uplata u Fond.

Željko Mirković je postavio dva pitanja.

Postavio je pitanje Federalnom zavodu za zapošljavanje o korisnicima i iznosu sredstava koji dobijaju na osnovu programa sufinansiranja zapošljavanja, programa Federalnog zavoda za zapošljavanje i programa pripreme za rad kroz obuku, stručno osposobljavanje i usavršavanje i obuku do zaposlenja. Zatražio je ove informacije po kantonima, iznos plasiranih sredstava i popis firmi kojima su doznačena ova sredstva.

Drugo pitanje je postavio Federalnom ministarstvu okoliša i turizma i Federalnom fondu za zaštitu okoliša: Koliko je sredstava izdvojeno za okoliš i dodijeljeno kantonima i projektima te da li su sredstva namjenski utrošena i opravdana. Ove podatke je zatražio za 2014. i 2015. godinu.

Admir Hadžipašić je postavio pitanje upravi Željeznica Federacije BiH i Federalnom ministarstvu prometa i komunikacija: Zašto se radnici (mašinovođe) iz poslovnice Žutveljeznica u Bihaću šalju na terenski rad u poslovnice Mostar, Zenica i Tuzla, da obavljaju poslove koje radnici u tim poslovnicama ne žele da rade?

Nakon postavljenih delegatskih pitanja i inicijativa Dom naroda raspravljao je o predloženom dnevnom redu.

Predsjedavajuća je obavijestila delegate da je Kolegij Doma naroda predložio da se u dnevni red današnje sjednice, kao 1. tačka, uvrsti Prijedlog rezolucije Doma naroda o izborima u Gradu Mostaru, koju je predložio delegat Predrag Kojović.

Na osnovu rezultata glasanja predsjedavajuća je konstatovala da je Dom naroda Parlamenta Federacije BiH, jednoglasno, sa 45 glasova, prihvatio da Prijedlog rezolucije o izborima u Gradu Mostaru bude uvršten u dnevni red kao 1. tačka.

Vlada Federacije Bosne i Hercegovine dostavila je Prijedlog zakona o izmjenama i dopunama Zakona o upravljanju otpadom s prijedlogom da se razmatra po hitnom postupku i Prijedlog zakona o izmjenama i dopunama Zakona o transplantaciji organa i tkiva u svrhu liječenja s prijedlogom da se razmatra po skraćenom postupku. Zakonodavna komisija je predložila da se ovi prijedlozi zakona razmatraju u redovnoj proceduri, odnosno u formi nacrtu zakona.

Na osnovu rezultata glasanja, predsjedavajuća je konstatovala da je Dom naroda Parlamenta Federacije BiH, sa 41 glasom za, tri uzdržana i jednim glasom protiv, prihvatio da Prijedlog zakona o izmjenama i dopunama Zakona o upravljanju otpadom bude razmatran u redovnoj proceduri.

Na osnovu rezultata glasanja predsjedavajuća je konstatovala da je Dom naroda Parlamenta Federacije Bosne i Hercegovine, sa 40 glasova za

i dva uzdržana glasa, prihvatio da Prijedlog zakona o izmjenama i dopunama Zakona o transplantaciji organa i tkiva u svrhu liječenja bude razmatran u redovnoj proceduri.

Također, Vlada Federacije dostavila je Prijedlog zakona o izmjeni Zakona o izmirenju obaveza po osnovi računa stare devizne štednje u Federaciji BiH s prijedlogom da se razmatra po skraćenom postupku.

Na osnovu rezultata glasanja predsjedavajuća je konstatovala da je Dom naroda Parlamenta Federacije BiH, sa 39 glasova za, tri uzdržana i tri protiv, prihvatio da Prijedlog zakona o izmjeni Zakona o izmirenju obaveza po osnovi računa stare devizne štednje u Federaciji Bosne i Hercegovine bude razmatran po skraćenom postupku.

Kolegij je predložio Domu da tačku 12. predviđenog dnevnog reda - Usaglašavanje Zakona o komasaciji - skine s dnevnog reda današnje sjednice i uputi Zakonodavnompravnoj komisiji Doma naroda na daljnji postupak zbog nejasnoća u vezi dopisa koji je uputio direktor Federalne uprave za geodetske i imovinsko - pravne poslove. Prijedlog Kolegija je bio i skidanje tačaka 5. i 6. - Prijedloga zakona o upravljanju državnim kapitalom u privrednim društvima u Federaciji Bosne i Hercegovine i Prijedloga zakona o poljoprivrednoj organskoj proizvodnji - zbog tehničkih problema, a Prijedlog zakona o poljoprivrednoj organskoj proizvodnji povučen je s dnevnog reda sjednice Predstavničkog doma održane dan ranije.

Na osnovu rezultata glasanja predsjedavajuća je konstatovala da je Dom naroda Parlamenta Federacije BiH, sa 34 glasa za i devet uzdržanih glasova, prihvatio prijedlog Kolegija da ove tačke skinu s dnevnog reda današnje sjednice.

S obzirom da više nije bilo prijedloga za izmjenu i dopunu predloženog dnevnog reda, predsjedavajuća je, na osnovu rezultata glasanja, konstatovala da je Dom naroda Parlamenta Federacije BiH sa 38 glasova za i pet uzdržanih glasova, usvojio sljedeći

DNEVNI RED

1. Prijedlog rezolucije Doma naroda o izborima u Gradu Mostaru (predlagač: Predrag Kojović, delegat u Domu naroda),
2. Prijedlog zakona o izmjeni Zakona o izmirenju obaveza po osnovu računa stare devizne štednje u Federaciji Bosne i Hercegovine - skraćeni postupak,
3. Prijedlog zakona o finansijskom upravljanju i kontroli u javnom sektoru u Federaciji Bosne i Hercegovine,
4. Nacrt zakona o izmjenama i dopunama Zakona o upravljanju otpadom,

5. Nacrt zakona o izmjenama i dopunama Zakona o transplantaciji organa i tkiva u svrhu liječenja,
6. Nacrt zakona o Fondu za zaštitu okoliša i energetske efikasnost Federacije Bosne i Hercegovine,
7. Nacrt zakona o zaštiti okoliša,
8. Izvještaj o radu Vlade Federacije Bosne i Hercegovine za 2015. godinu,
9. Informacija o izvršenim revizijama privatizacije državnog kapitala privrednih društava i banaka u Federaciji Bosne i Hercegovine za period mart - oktobar 2015. godine,
10. Izvještaj Parlamentarne komisije odgovorne za reviziju o revizijskom izvještaju Budžeta Federacije Bosne i Hercegovine i revidiranih korisnika Budžeta Federacije Bosne i Hercegovine za 2014. godinu,
11. Izbor i imenovanje:
 - Prijedlog odluke o izboru potpredsjedavajućeg Doma naroda Parlamenta Federacije Bosne i Hercegovine iz reda srpskog naroda.

1. Prijedlog rezolucije Doma naroda o izborima u Gradu Mostaru

Prijedlog je uputio Predrag Kojović, delegat u Domu naroda Parlamenta Federacije BiH.

Predsjedavajuća je kazala da je predlagač u međuvremenu napravio izmjene u tekstu Prijedloga, te pozvala predlagača da pročita i obrazloži Rezoluciju.

U raspravi su učestvovali: Tomislav Martinović, Osman Ćatić i Đuro Prkačin.

Predsjedavajuća Doma naroda stavila je na glasanje Prijedlog rezolucije Doma naroda o izborima u Gradu Mostaru.

Na osnovu rezultata glasanja, predsjedavajuća je konstatovala da je Dom naroda Parlamenta Federacije BiH, sa 46 glasova za, donio Rezoluciju o izborima u Gradu Mostaru u tekstu kako slijedi:

Pozivajući se na Univerzalnu deklaraciju o pravima čovjeka, Evropsku konvenciju o zaštiti ljudskih prava i temeljnih sloboda, Evropsku povelju o lokalnoj samoupravi, Ustav Bosne i Hercegovine i Ustav Federacije Bosne i Hercegovine,

Polazeći od principa da lokalna samouprava podrazumijeva pravo i osposobljenost lokalnih vlasti da, u granicama zakona, reguliraju i rukovode znatnim dijelom javnih poslova na osnovu vlastite odgovornosti i u interesu lokalnog stanovništva,

Smatrajući obavezom izabranih predstavnika na svim nivoima vlasti u Bosni i Hercegovini da poduzmu sve mjere kojima se doprinosi provedbi presuda Ustavnog suda Bosne i Hercegovine i Ustavnog suda Federacije Bosne i Hercegovine,

Izražavajući zabrinutost zbog činjenice da građani Mostara od 2008. godine nisu glasali o svojim predstavnicima na lokalnom nivou,

Na osnovu člana IV.A.4.17. Ustava Federacije Bosne i Hercegovine, Dom naroda Parlamenta Federacije Bosne i Hercegovine na sjednici, održanoj 21.04.2016. godine, donio je

REZOLUCIJU DOMA NARODA O IZBORIMA U GRADU MOSTARU

Uzevši u obzir gore navedeno, Dom naroda Parlamenta Federacije Bosne i Hercegovine poziva zastupnike i delegate Parlamentarne skupštine Bosne i Hercegovine da u okviru svojih nadležnosti poduzmu sve mjere s ciljem osiguranja organizacije izbora i zaštite jedinstvenog grada Mostara:

1. Pozivamo ih na hitno usvajanje izmjena Izbornog zakona Bosne i Hercegovine kojima će se omogućiti održavanje izbora za Gradsko vijeće i gradonačelnika Grada Mostara u okviru redovnih lokalnih izbora 2016. godine.
2. Tražimo da predstavnici parlamentarnih političkih stranaka preuzmu odgovornost za donošenje najboljeg i najpovoljnijeg rješenja u interesu lokalne zajednice.
3. Naglašavamo potrebu da se status Grada Mostara rješava uvažavajući principe lokalne samouprave, djelujući u općem interesu, te uvažavajući zahtjeve i prijedloge koji su u skladu s najvišim međunarodnim standardima ljudskih prava, građanskih sloboda i zabrane diskriminacije.

2. Prijedlog zakona o izmjeni Zakona o izmirenju obaveza po osnovu računa stare devizne štednje Federacije BiH

Prijedlog zakona utvrdila je Vlada Federacije.

Prijedlog zakona obrazložila je Mensura Kožo, predstavnica Federalnog ministarstva finansija.

Prijedlog zakona razmatrala su nadležna radna tijela i dostavila svoje izvještaje.

U raspravi je učestvovao Osman Ćatić.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, sa 39 glasova za, usvojio Prijedlog zakona o izmjeni Zakona o izmirenju obaveza po osnovu računa stare devizne štednje Federacije BiH.

3. Prijedlog zakona o finansijskom upravljanju i kontroli u javnom sektoru Federacije BiH

Prijedlog zakona utvrdila je Vlada FBiH.

Predsjedavajuća je podsjetila da je Predstavnički dom Parlamenta Federacije BiH obavijestio Dom naroda da je u nastavku 9. sjednice, 19. aprila 2016. godine, usvojio Prijedlog ovog zakona u tekstu kako ga je predložila Vlada Federacije Bosne i Hercegovine.

Prijedlog zakona razmatrala su nadležna radna tijela i dostavila svoje izvještaje.

Prijedlog zakona je obrazložila Fatima Obhodžaš, predstavnica Federalnog ministarstva finansija.

U raspravi su učestvovali: Mirvet Beganović, Aner Žuljević, Željko Mirković, Muhamed Kozadra, Osman Ćatić, Željko Josić i Slaviša Šućur.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, sa 39 glasova za i jednim protiv, usvojio Prijedlog Zakona o finansijskom upravljanju i kontroli u javnom sektoru u FBiH.

4. Nacrt zakona o izmjenama i dopunama Zakona o upravljanju otpadom

Zakon je utvrdila Vlada FBiH.

Zakon su razmatrala nadležna radna tijela i dostavila svoje izvještaje.

Zakon je obrazložio Mehmed Cero, predstavnik Federalnog ministarstva okoliša i turizma.

U raspravi su učestvovali: Mirvet Beganović, Mirko Batinić, Željko Mirković, Željko Josić, Draženka Subašić, Osman Ćatić i Dario Pušić.

Predsjedavajuća je stavila na glasanje sljedeći

ZAKLJUČAK

1. Dom naroda Parlamenta Federacije Bosne i Hercegovine prihvata Nacrt zakona o izmjeni Zakona o izmjenama i

dopunama Zakona o upravljanju otpadom i smatra da može poslužiti kao osnova za izradu prijedloga zakona.

2. Zadužuje se Vlada Federacije da organizira i provede javnu raspravu u trajanju od 90 dana u skladu sa procedurom propisanom Ustavom Federacije BiH za donošenje Zakona iz zajedničke nadležnosti federalne vlasti i kantona.
3. Zadužuje se Vlada Federacije da prilikom izrade prijedloga zakona ima u vidu primjedbe, prijedloge i sugestije iznesene na sjednici Doma naroda kao i u javnoj raspravi.

Na osnovu rezultata glasanja, predsjedavajuća je konstatovala da je Dom naroda Parlamenta FBiH, sa 33 glasa za, usvojio pomenuti zaključak.

5. Nacrt zakona o izmjenama i dopunama Zakona o transplataciji organa i tkiva u svrhu liječenja

Nacrt je utvrdila Vlada FBiH.

Predsjedavajuća je obavijestila prisutne da je Vlada Federacije BiH naknadno dostavila tri amandmana na prijedlog zakona.

Nacrt su razmatrala nadležna radna tijela i dostavila svoje izvještaje.

Nacrt je obrazložila Snježana Bodnaruk, predstavnica Federalnog ministarstva zdravstva.

U raspravi su učestvovali: Goran Akšamija, Tomislav Martinović, Željko Mirković, Draženka Subašić, Mirko Batinić i Aner Žuljević.

Domu naroda obratila se i Lada Sarajlić, direktorica Centra za transplantacijsku medicinu pri Federalnom ministarstvu zdravstva.

Predsjedavajuća je stavila na glasanje sljedeći

ZAKLJUČAK

1. Dom naroda Parlamenta Federacije BiH prihvata Nacrt zakona o o izmjenama i dopunama Zakona o transplataciji organa i tkiva u svrhu liječenja i smatra da može poslužiti kao osnova za izradu prijedloga zakona.
2. Zadužuje se Vlada Federacije da organizuje i provede javnu raspravu u trajanju do 60 dana u skladu sa procedurom propisanom Ustavom Federacije BiH za donošenje Zakona iz zajedničke nadležnosti federalne vlasti i kantona.
3. Zadužuje se Vlada Federacije BiH da prilikom izrade prijedloga zakona ima u vidu primjedbe, prijedloge i sugestije iznesene na sjednici Doma.

Na osnovu rezultata glasanja, predsjedavajuća je konstatovala da Dom naroda Parlamenta Federacije Bosne i Hercegovine, sa 36 glasova za, usvojio navedeni zaključak.

6. Nacrt zakona o Fondu za zaštitu okoliša i energetske učinkovitost Federacije BiH

Nacrt zakona utvrdila je Vlada FBiH.

Predsjedavajuća je podsjetila da je Predstavnički dom Parlamenta Federacije BiH obavijestio Dom naroda da je na nastavku 27. sjednice, 26. marta 2014. godine, razmatrao Nacrt zakona o Fondu za zaštitu okoliša i energetske učinkovitost Federacije BiH i zaključkom ga prihvatio. Tom prilikom, ovaj zakon je stavljen na javnu raspravu.

Nacrt zakona razmatrala su nadležna radna tijela i dostavila svoje izvještaje.

Nacrt zakona je obrazložio Mehmed Cero, predstavnik Federalnog ministarstva okoliša i turizma.

U raspravi su učestvovali: Edin Forto, Slaviša Šučur, Dario Pušić, Osman Ćatić, Mirko Batinić, Admi Hadžipašić i Almedin Aliefendić.

Predsjedavajuća je stavila na glasanje sljedeći

ZAKLJUČAK

1. Dom naroda Parlamenta Federacije BiH prihvaća Nacrt zakona o Fondu za zaštitu okoliša i energetske učinkovitost Federacije BiH i smatra da može poslužiti kao osnova za izradu prijedloga zakona.
2. Zadužuje se Vlada Federacije da organizira i provede javnu raspravu u trajanju do 60 dana u skladu sa procedurom propisanom Ustavom Federacije BiH za donošenje Zakona iz zajedničke nadležnosti federalne vlasti i kantona.
3. Zadužuje se Vlada Federacije BiH da prilikom izrade prijedloga zakona ima u vidu primjedbe, prijedloge i sugestije iznesene na sjednici Doma.

Na osnovu rezultata glasanja, predsjedavajuća je konstatovala da Dom naroda Parlamenta Federacije Bosne i Hercegovine, sa 32 glasa za, jednim glasom protiv, i jednim uzdržanim glasom, usvojio pomenuti zaključak.

Sjednica je prekinuta u 15:00.

Nastavak sjednice, 12. maj 2016. godine

Sjednica je počela u 11:40.

Sjednicom je predsjedavala Lidija Bradara, predsjedavajuća Doma naroda Parlamenta Federacije BiH.

Predsjedavajuća je pozdravila delegate, goste, kao i ministre u Vladi, a posebno potpredsjednika Federacije BiH, Milana Dunovića, predstavnike međunarodnih organizacija i akreditiranih medijskih kuća.

Na osnovu evidencije Stručne službe, predsjedavajuća je konstatovala da sjednici prisustvuje 42 delegata, što čini većinu, te Dom naroda može raditi i punovažno odlučivati.

Izostanak sa sjednice najavili su delegati Muhamed Kozadra, Nikola Simić, Amor Mašović i Ana Babić.

Predsjedavajuća je podsjetila delegate o preostalim tačkama dnevnog reda i prešla na rad.

7. Nacrt zakona o zaštiti okoliša

Nacrt zakona utvrdila je Vlada FBiH.

Predsjedavajuća je podsjetila da je Predstavnički dom Parlamenta Federacije BiH obavijestio Dom naroda da je u nastavku 30. sjednice, 4. juna 2014. godine, razmatrao Nacrt zakona o zaštiti okoliša i i zaključkom ga prihvatio. Tom prilikom, ovaj nacrt je stavljen na javnu raspravu u trajanju od 90 dana.

Nacrt zakona razmatrala su nadležna radna tijela i dostavila svoje izvještaje.

Nacrt zakona je obrazložio Mehmed Cero, predstavnik Federalnog ministarstva okoliša i turizma.

U raspravi su učestvovali: Dražen Matišić, Osman Ćatić, predsjednik Kluba delegata bošnjačkog naroda, Dario Pušić, Draženka Subašić, Željko Mirković i Mirvet Beganović.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, sa 39 glasova za, i dva glasa protiv, usvojio sljedeći

ZAKLJUČAK

1. Dom naroda prihvaća Nacrt zakona o zaštiti okoliša i smatra da može poslužiti kao osnova za izradu Prijedloga zakona.
2. Zadužuje se predlagač da organizuje i provede javnu raspravu u trajanju od 90 dana u skladu sa procedurom propisanom Ustavom Federacije Bosne i Hercegovine za donošenje zakona iz zajedničke nadležnosti federalne vlasti i kantona.

3. Zadužuje se Vlada Federacije Bosne i Hercegovine da, prilikom izrade Prijedloga zakona, ima u vidu sugestije, primjedbe i prijedloge iznesene na sjednici Doma naroda i u javnoj raspravi.

8. Izvještaj o radu Vlade Federacije Bosne i Hercegovine za 2015. godinu

Izvještaj o radu dostavila je Vlada Federacije radi razmatranja.

Izvještaj su razmatrala nadležna radna tijela i dostavila svoje izvještaje.

Izvještaj je obrazložio Fadil Novalić, premijer Federacije Bosne i Hercegovine.

U raspravi su učestvovali: Aner Žuljević, Slaviša Šućur, Mladen Lonić, Ismet Sarajlić, Osman Čatić, Tomislav Martinović, predsjednik Kluba delegata hrvatskog naroda, Rasim Kantarević, Amil Buljubašić, Mirvet Beganović, Jasenko Tufekčić, Draženka Subašić i Admir Hadžipašić.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, sa 28 glasova za, 14 glasova protiv i jednim uzdržanim glasom, prihvatio Izvještaj o radu Vlade Federacije BiH za 2015. godinu.

9. Informacija o izvršenim revizijama privatizacije državnog kapitala privrednih društava i banaka u Federaciji Bosne i Hercegovine za period mart - oktobar 2015. godine

Informaciju je dostavila Vlada Federacije radi informiranja.

Također, Vlada Federacije dostavila je i Prijedlog zaključka radi razmatranja i donošenja.

Informaciju su razmatrala nadležna radna tijela i dostavila svoje izvještaje.

Predstavnik Agencije za reviziju privatizacije u Federaciji BiH, Vedad Duraković, obrazložio je Informaciju.

Uime Odbora za denacionalizaciju i privatizaciju, Drago Puzigaća, predsjednik Odbora, obrazložio je Izvještaj Odbora kojim je predložio Domu naroda da se prilikom prihvatanja ove informacije izostave riječi: "i banaka" jer u ovom periodu nijedna banka nije bila predmet revizije.

U raspravi su učestvovali: Slaviša Šućur, Tomislav Martinović, Mirvet Beganović i Osman Čatić, koji je, uime Kluba delegata bošnjačkog naroda, predložio zaključak.

Nakon rasprave, predsjedavajuća Doma naroda stavila je na glasanje zaključak koji je predložio Klub delegata bošnjačkog naroda i konstatovala da je Dom naroda Parlamenta Federacije Bosne i Hercegovina, sa 30 glasova za i četiri uzdržana glasa, usvojio sljedeći

ZAKLJUČAK

1. Nalaže se Vladi Federacije Bosne i Hercegovine da pristupi izmjenama i dopunama Zakona o reviziji privatizacije državnog kapitala u privrednim društvima i bankama i da iz moratorija na zapošljavanje izuzme Agenciju za reviziju privatizacije u Federaciji BiH, sa dopuštenjem da završi konkursnu proceduru, odnosno zaposli šest revizora.

Na osnovu rezultata glasanja o Informaciji o izvršenim revizijama privatizacije državnog kapitala privrednih društava i banaka u Federaciji BiH za period mart - oktobar 2015. godine, predsjedavajuća je konstatovala da Dom naroda Parlamenta Federacije BiH nije prihvatio Informaciju; za je glasalo 14 delegata, 19 je bilo uzdržano, a dva protiv.

10. Izvještaj Parlamentarne komisije odgovorne za reviziju o revizijskom izvještaju Budžeta Federacije Bosne i Hercegovine i revidiranih korisnika Budžeta Federacije BiH za 2014. godinu

Parlamentarna komisija odgovorna za reviziju sačinila je Izvještaj o revizijskom izvještaju Budžeta Federacije Bosne i Hercegovine i revidiranih korisnika Budžeta Federacije BiH za 2014. godinu i dostavila ga Parlamentu Federacije.

Izvještaj je obrazložila Lidija Bradara, predsjednica Komisije.

Domu naroda se obratio Dževad Nekić, generalni revizor Ureda za reviziju institucija u Federaciji Bosne i Hercegovine.

U raspravi nije niko učestvovao.

Na osnovu rezultata glasanja, predsjedavajuća je konstatovala da je Dom naroda Parlamenta Federacije BiH, sa 35 glasova za, dva protiv i tri uzdržana, usvojio sljedeće

ZAKLJUČKE

1. Usvaja se 20 izvještaja o obavljenoj reviziji finansijskih izvještaja korisnika Budžeta FBiH za 2014. godinu i Izvještaj o izvršenoj reviziji Budžeta FBiH za 2014. godinu.
2. Usvaja se Izvještaj Parlamentarne komisije odgovorne za reviziju broj: 03/7-02-1929,1930,1931,1932/15, od 21. 3. 2016. godine, povodom Izvještaja o obavljenoj reviziji Budžeta FBiH i korisnika Budžeta FBiH za 2014. godinu, uključujući 21 pojedinačni izvještaj za svaku instituciju posebno, koji se smatraju sastavnim dijelom ovih zaključaka.
3. Zadužuje se Vlada FBiH da u roku od 60 dana od dana usvajanja ovih zaključaka, dostavi Parlamentu FBiH detaljan pregled aktivnosti koje su preduzete povodom Izvještaja revizije Budžeta FBiH za 2014. godinu i korisnika Budžeta.

4. U cilju jačanja kontrolnog okruženja i sistema internih kontrola, jačanja finansijske discipline i vladavine prava, zadužuje se Vlada FBiH da u roku, ne dužem od 180 dana, uz pomoć Federalnog ministarstva finansija, donese „Instrukciju za uspostavu i održavanje internih kontrola“ za korisnike Budžeta FBiH.
5. Da Vlada FBiH, uz podršku Federalnog ministarstva finansija, u roku ne dužem od 180 dana, pristupi izradi kombinovane liste zakona i podzakonskih propisa koji se trebaju donijeti ili dopuniti prema revizorskim preporukama datim u:
 - „Izveštaju o izvršenoj reviziji Budžeta FBiH za 2014. godinu“,
 - „Izveštaju o reviziji finansijskih izvještaja Vlade Federacije BiH za 2014. godinu“, i - „Izveštaju o reviziji finansijskih izvještaja Federalnog ministarstva finansija za 2014. godinu“.Pored spiska propisa, potrebno je izraditi programski dokument sa pregledom rokova i nosilaca zadataka za period 2016. - 2017. za izradu propisa ili dopuna, te da se kao objedinjena informacija dostavi Parlamentu FBiH na razmatranje u gore navedenom roku.
6. Da Vlada FBiH, uz podršku Federalnog ministarstva finansija, odmah pristupi izmjenama i donošenju propisa čije je usvajanje zatraženo ranijim zaključcima Komisije povodom obavljene finansijske revizije 2013. godine, za sljedeće kategorije troškova:
 - Ugovori o djelu, te ugovori za privremene i povremene poslove
 - Putni troškovi (službena putovanja)
 - Izdaci za telefonske i poštanske usluge
 - Nabava službenih vozila
 - Izdaci za gorivo, materijal i usluge za održavanje vozila
 - Troškovi smještaja federalnih institucija
 - Ugovorene i druge posebne usluge
 - Naknade za rad u stručnim komisijama i drugim radnim tijelima
 - Izdaci za internu i eksternu reprezentaciju.
7. Da Vlada FBiH do kraja 2016. godine pokrene postupke, procedure i pristupi provedbi zakonskih i podzakonskih propisa vezanih za rješavanje neriješenih pitanja imovine, obaveza i potraživanja institucija koje su u prethodnom periodu prešle na državnu nivo (Federalno ministarstvo obrane, Carinska uprava, OSA).
8. Da Vlada FBiH do kraja 2016. godine pokrene postupke, procedure i pristupi rješavanju pitanja neusaglašenih propisa i provedbi presuda Ustavnog suda, koje se generalno odnose na slučajeve neusaglašenosti zakonskih propisa, uredbi, odluka i drugih provedbenih akata, što u narednom periodu može donijeti nove troškove značajne za budžet.
9. Da Vlada FBiH, u roku ne dužem od 90 dana, zajedno sa Federalnim ministarstvom finansija, podnese izvještaj Parlamentu FBiH o uspostavi kapaciteta i funkcija internih kontrola, interne revizije i budžetske inspekcije, sa priloženim programom koji obuhvaća provedbu odredbi članova 79.-87. Zakona o budžetima u FBiH, te odredbi Uredbe o budžetskom nadzoru u FBiH (Uredba o budžetskom nadzoru u Federaciji BiH, V broj: 751/2014 od

24. aprila 2014. godine) i drugih akata (Strategija javne interne finansijske kontrole u Federaciji BiH; Zakona o internoj reviziji u javnom sektoru u Federaciji Bosne i Hercegovine, itd.), sa pregledom aktuelnih aktivnosti, imenima zaduženih osoba i finansijskim planom realizacije. Programom je potrebno obuhvatiti i pregled nedostajućih kadrova u Vladi FBiH i u Federalnom ministarstvu finansija.

10. Zadužuje se Vlada FBiH da prilikom dostavljanja izvještaja o dugu i zaduženju Parlamentu FBiH, dodatno dostavlja potpunu informaciju o utrošku sredstava odobrenih za investicijske - razvojne projekte, po osnovu usvojenih programa javnih investicija u Federaciji BiH.

11. Zadužuje se Vlada FBiH da u roku ne dužem od 90 dana prijedloge mjera značajno većeg stepena nadzora u oblasti isplata tekućih i kapitalnih grantova, osim kontrola koje su uspostavljene za transfere za braniteljske invalidnine, druga braniteljska davanja zasnovana na zakonu, invalidnine za neratne invalide, civilne žrtve rata, raseljene i izbjegle osobe, transfere socijalnog karaktera, te da u dodatnom roku od 60 dana, dostavi Parlamentu FBiH sveobuhvatnu informaciju i prijedloge mjera dogradnje kontrolnog okruženja za sve nespomenute tekuće i kapitalne transfere koje će, između ostalog, obuhvatiti sljedeće mjere:

a) Unaprijediti sisteme odlučivanja, davanja saglasnosti, odobravanja prema odredbama Zakona o sistemu državne pomoći Bosne i Hercegovine („Službeni glasnik BiH“, broj 10/12);

b) Unaprijediti način donošenja odluka Vlade FBiH o tekućim i kapitalnim transferima u pravcu jačanja individualne odgovornosti nadležnog rukovodioca organa uprave, saglasno konceptu fiskalne odgovornosti. Odluke Vlade FBiH o tekućim i kapitalnim transferima trebaju sadržavati analize realizacije ranijih programa utroška istovrsnih transfera, sa osvrtom na preporuke Ureda za reviziju i preporuke interne revizije da se izbjegne ponavljanje ranijih grešaka.

c) Da Vlada FBiH svoje odluke za tekuće i kapitalne transfere bazira na sadržajima sektorskih strategija Federacije BiH. Odluke bi trebale utvrditi indikatore progresa i indikatore krajnjeg rezultata koji će omogućiti praćenje efekata realizacije transfera, te primjeniti pristup projektnog menadžmenta prilikom planiranja i odobravanja transfera.

Tako će se sinhronizirati strateška opredjeljenja Federacije BiH sa praksom jednostranih tekućih i kapitalnih transfera, te pratiti implementacija sektorskih strategija, koje je usvojio Parlament Federacije BiH, uključujući provedbu godišnjih programa rada i trogodišnjih projekcija obuhvaćenih dokumentima okvirnog proračuna;

d) Da Vlada FBiH uspostavi formalni okvir kojim će se napustiti praksa korišćenja dijela tekućih i kapitalnih transfera po klauzuli „diskrecijske rezerve“ rukovodilaca nadležnih organa javne uprave.

e) Da se planiranje i odobravanje tekućih i kapitalnih transfera vrši prema nadležnostima organa javne uprave, kako bi se izbjegla praksa da su za iste ili slične transfere zaduženi različiti organi javne uprave.

f) Da mjere jačanja transparentnosti i većeg pristupa javnim informacijama obuhvate kreiranje dvije baze podataka - baze svih tekućih i kapitalnih transfera i baze primatelja tekućih i kapitalnih transfera.

g) Da Vlada FBiH na web stranici javno objavljuje kriterije raspodjele tekućih i kapitalnih transfera, kao i javne objave rezultata raspodjele na krajnje korisnike, uključujući rang liste, te izvještava o utrošku sredstava transfera.

h) Da se Parlamentu FBiH predlože zakonska rješenja kojima će se jasno i precizno odrediti postupanje nadležnih institucija u slučajevima nenamjenskog utroška transferiranih sredstava, zloupotrebe, prevare i korupcije, te definirati postupke povrata doznačenih sredstava u navedenim slučajevima.

i) Da Vlada FBiH predloži zakonsko rješenje Parlamentu FBiH kojim će se uspostaviti obaveza svim korisnicima Budžeta FBiH da prilikom dodjele jednostranih tekućih i kapitalnih transfera obavljaju monitoring i evaluaciju i javno objavljuju rezultate monitoringa i evaluacije za transfere iz svoje nadležnosti.

12. Praćenje realizacije zaključaka

12.1. Zadužuju se revidirani korisnici Budžeta FBiH da najkasnije 60 dana po usvajanju ovog izvještaja dostave pisane programe implementacije i izvještaj o realizaciji preporuka revizije i ovih zaključaka za revidiranu 2014. godinu Parlamentarnoj komisiji odgovornoj za reviziju. U istom roku, da Vlada FBiH i Federalno ministarstvo finansija dostave istovjetni program povodom „Izvještaja o izvršenoj reviziji Budžeta FBiH za 2014. godinu“.

12.2. Zadužuje se Parlamentarna komisija odgovorna za reviziju da aktivno prati realizaciju ovih zaključaka, na način da vrši korespondenciju sa revidiranim korisnicima Budžeta FBiH, po potrebi organizuje radne sastanke, te sjednice Komisije posvećene realizaciji preporuka revizije iz 2014. godine.

11. Izbor i imenovanje:

- **Prijedlog odluke o izboru potpredsjedavajućeg Doma naroda Parlamenta Federacije Bosne i Hercegovine iz reda srpskog naroda**

Predsjednik Komisije za izbor i imenovanja Doma naroda, Tomislav Martinović, u ime Komisije konstatovao je sljedeće:

Na sjednici održanoj 2. 3. 2016. godine, Klub delegata srpskog naroda je odlučio da predloži Željka Mirkovića za potpredsjedavajućeg Doma naroda Parlamenta Federacije BiH iz reda srpskog naroda;

Također, delegati Mile Marčeta i Slaviša Mihajlović su predložili Dragu Puzigaću za potpredsjedavajućeg Doma naroda Parlamenta Federacije BiH iz reda srpskog naroda;

Delegatkinja Daliborka Milović je dostavila Prijedlog kojim predlaže Daliborku Milović za potpredsjedavajuću

Doma naroda Parlamenta Federacije BiH iz reda srpskog naroda.

Komisija za izbor i imenovanja razmatrala je ove prijedloge i utvrdila listu kandidata za potpredsjedavajućeg Doma naroda Parlamenta Federacije BiH iz reda srpskog naroda:

1. Željko Mirković,
2. Daliborka Milović,
3. Drago Puzigaća.

Predsjednik Komisije je konstatovao da su prijedlozi za potpredsjedavajućeg Doma naroda podneseni u skladu sa članom 35. Poslovnika o radu Doma naroda i da se izbor potpredsjedavajućeg vrši u skladu sa ovim članom.

U ime Kluba delegata bošnjačkog naroda, Osman Ćatić zatražio je pauzu, nakon koje je izjavio da se u Klubu nisu mogli usaglasiti oko predloženih kandidata te je zatražio odgodu izjašnjavanja.

Slaviša Šućur, u ime Kluba delegata srpskog naroda, zatražio je pauzu.

Nakon pauze, Slaviša Šućur je izjavio da Klub delegata srpskog naroda ne pristaje na odgodu izjašnjavanja i otvaranje 13. sjednice dok se Dom naroda ne izjasni o izboru potpredsjedavajućeg Doma naroda iz reda srpskog naroda.

Predsjedavajuća je prekinula sjednicu u 16:42.

Nastavak sjednice, 23. juni 2016. godine

Sjednica je počela u 12:30.

Sjednicom je predsjedavala Lidija Bradara, predsjedavajuća Doma naroda Parlamenta Federacije BiH.

Na početku sjednice predsjedavajuća je pozdravila delegate, predsjednika Federacije, Marinka Čavaru, premijera Federacije Bosne i Hercegovine, Fadila Novalića, predstavnike međunarodnih organizacija, akreditiranih medijskih kuća i goste.

Izostanak sa sjednice je opravdala Daliborka Milović.

Predsjedavajuća je podsjetila delegate da je za rad na ovoj sjednici preostala tačka - Prijedlog odluke o izboru potpredsjedavajućeg Doma naroda Parlamenta Federacije Bosne i Hercegovine iz reda srpskog naroda

Osman Ćatić, predsjednik Kluba delegata bošnjačkog naroda zatražio je pauzu u trajanju od 30 minuta.

Nakon pauze, predsjednik Kluba je izjavio da je Klub spreman za nastavak sjednice.

Predsjedavajuća je podsjetila delegate da je na sjednici održanoj 2. 3. 2016. godine, Klub delegata srpskog naroda odlučio da predloži Željka Mirkovića za potpredsjedavajućeg Doma naroda Parlamenta Federacije BiH iz reda srpskog naroda;

Također, delegati Mile Marčeta i Slaviša Mihajlović predložili su Dragu Puzigaću za potpredsjedavajućeg Doma naroda Parlamenta Federacije BiH iz reda srpskog naroda;

Delegatkinja Daliborka Milović je dostavila Prijedlog kojim predlaže Daliborku Milović za potpredsjedavajuću Doma naroda Parlamenta Federacije BiH iz reda srpskog naroda.

Komisija za izbor i imenovanja razmatrala je ove prijedloge i utvrdila listu kandidata za potpredsjedavajućeg Doma naroda Parlamenta Federacije BiH iz reda srpskog naroda:

1. Željko Mirković,
2. Daliborka Milović,
3. Drago Puzigaća.

Predsjedavajuća je podsjetila delegate na način glasanja u slučaju da za jedno mjesto ima više kandidata, član 35. Poslovnika o radu Doma naroda, prema kojem će prvo biti obavljeno glasanje za kandidata kojeg je predložio Klub naroda. Nakon utvrđivanja liste kandidata za svako mjesto pristupa se glasanju. Ako od više kandidata za jedno mjesto nijedan nije dobio potrebnu većinu, glasanje se ponavlja za dva kandidata koji su dobili najviše glasova. Odluka o izboru donosi se većinom glasova s tim što će, eventualno usaglašavanje obaviti predstavnici klubova naroda u Domu naroda, a ako usaglašavanje ne uspije glasanje se u cijelosti ponavlja. Ako nijedan kandidat ne dobije potrebnu većinu glasanje se u cijelosti ponavlja.

Na osnovu rezultata glasanja, predsjedavajuća je konstatovala da Dom naroda Parlamenta Federacije BiH, nije donio odluku o izboru Željka Mirkovića za potpredsjedavajućeg Doma naroda Parlamenta Federacije BiH iz reda srpskog naroda; za je glasalo 16 delegata, a 30 delegata je bilo uzdržano.

Budući da je Slaviša Šućur izrazio sumnju u rezultate glasanja, sekretar Dom naroda, Izmir Hadžiavić, obavio je poimenično glasanje. Na osnovu rezultata poimeničnog glasanja, predsjedavajuća je konstatovala da Dom naroda Parlamenta Federacije Bosne i Hercegovine nije donio odluku o izboru Željka Mirkovića za potpredsjedavajućeg Doma naroda Parlamenta Federacije Bosne i Hercegovine iz reda srpskog naroda; za je glasalo 18 delegata, a 30 delegata je bilo uzdržano.

Predsjedavajuća je konstatovala da sjednici prisustvuje 48 delegata.

Dom je, zatim, glasao o prijedlogu delegata Mileta Marčete i Slaviše Mihajlovića koji su predložili Dragu Puzigaću za potpredsjedavajućeg Doma naroda Parlamenta Federacije BiH iz reda srpskog naroda

Na osnovu rezultata glasanja, predsjedavajuća je konstatovala da je Dom naroda Parlamenta Federacije BiH sa 28 glasova za, 13 uzdržanih i šest protiv, donio Odluku o izboru Drage Puzigaće za potpredsjedavajućeg Doma naroda Parlamenta Federacije BiH iz reda srpskog naroda.

Budući da je Slaviša Šućur izrazio sumnju u rezultate glasanja, sekretar Doma naroda, Izmir Hadživdić, obavio je poimenično glasanje.

Na osnovu rezultata poimeničnog glasanja, predsjedavajuća je konstatovala da je Dom naroda Parlamenta Federacije BiH, sa 29 glasova za, 12 uzdržanih i sedam protiv, donio Odluku o izboru Drage Puzigaće za potpredsjedavajućeg Doma naroda Parlamenta Federacije BiH iz reda srpskog naroda.

Nakon toga, Dom je glasao o prijedlogu Daliborke Milović kojim je predložena Daliborka Milović za potpredsjedavajuću Doma naroda Parlamenta Federacije BiH iz reda srpskog naroda.

Na osnovu rezultata glasanja, predsjedavajuća je konstatovala da Dom naroda Parlamenta Federacije BiH, nije donio odluku o izboru Daliborke Milović za potpredsjedavajuću Doma naroda Parlamenta Federacije BiH iz reda srpskog naroda; za je glasalo 20 delegata, devet je bilo protiv, a 17 uzdržano.

Lejla Imamović izrazila je sumnju u rezultate glasanja te je sekretar Doma naroda obavio poimenično glasanje.

Na osnovu rezultata poimeničnog glasanja, predsjedavajuća je konstatovala da Dom naroda Parlamenta Federacije BiH nije donio odluku o izboru Daliborke Milović za potpredsjedavajuću Doma naroda Parlamenta Federacije BiH iz reda srpskog naroda i da je za glasalo 17 delegata, 11 je bilo protiv, a 20 uzdržano.

Slaviša Šućur čestitao je Dragi Puzigaći na izboru i izjavio da će se Klub delegata srpskog naroda boriti za ravnopravan tretman u odnosu na druga dva kluba.

Predsjedavajuća Doma naroda pridružila se čestitkama i novoizabranom zamjeniku poželjela puno uspjeha u obavljanju funkcije.

Sjednica je završena u 13:40.

Transkript sjednice čini sastavni dio Zapisnika.

SEKRETAR

Izmir Hadživdić

PREDSJEDAVALA

Lidija Bradara